

Il maletg romand da la Frantscha

Ina vischinanza multifara

DA GUIU SOBIELA-CAANITZ

Tgi che taidla l'emissiun «Forum» da Radio Suisse romande ha segir badà l'acribia da noss «confédérés» areguard il cumbat electoral en il vast pajais limit-rof. Quai constat gia ussa, schebain ch'ins po savair pir en matg tgi che duai reger la Frantscha enfin a 2022. Christophe Büchi (Losanna), correspondent da la «NZZ» en Romandie, ha deditgà in artitgel detaglià al maletg da la Frantscha en quella part da la Sviza (pp. 14-15). I vala la paina da resummar lez essai, cumplettond cun las remartgas d'in erudit genevrin oz emblidà che scriveva tranter 1943 e 1956 en la «Gazette de Lausanne».

Christophe Büchi analysescha

Lemprim fa Büchi endament: «En ils davos onns ha il maletg romand da la Frantscha sa stgirentà pulit: In pajais nua ch'i na funcziunescha quasi nagut da quei che duess funcziunar (...) cun chaumas, demonstraziuns e dschihadissem (...). Gia il Vaudais Philippe-Sirice Bridel [1757-1845] ha scrit: 'Il Svizzer (...) n'astga betg esser in chajachautschas u in litgamauns; quels vizis da sclavs surlaschain nus als Franzos.' Henri-Frédéric Amiel [1821-1881], docent genevrin da litteratura, n'è betg stà bler pli gentil: 'Tut è vid tar ils Franzos' (...). La

Romandie ha d'engraziar vaira bler a la Frantscha, oravant tut ina part da sia atgna suveranitat (...). Pir cun la fundaziun da la Republica helvetica 1798 è naschè enzatge sco ina Sviza romanda (...). A medem temp ha lezza perioda manà ina sclavaria nova. Quai han badà l'empirim ils Giurassians dal nord [da l'actual chantun Giura], 'liberads' ed annexads enira 1792 da la Frantscha. Il medem han fatg tras 1797 il Giura dal sid [l'actual Giura bernais] e Bienna (...). Tuts èn la finala vegnids avdants d'in 'département' franzos. Il medem è succedi cun Genevra ed il Vallais (...): I han survegnì enavos lur suveranitat pir da decembre 1813 cun la partenza da las truppas franzosas (...). Cun la Republica helvetica èn ils umans dal Vad, da la Gruyère e da Friburg vegnids 'citoyens' (...). Il temp dals Franzos è stà per ils Romands in temp da libertad nova e da dependenza nova (...). I eran dividids perfin durant la guerra da 1870 tranter Franzos e Tudestgs. Ina part sostegneva la Frantscha, in'altra percuter aveva fermas resalvas cunter l'imperi da Napoleun III [1808-1873] che valeva sco clerical. Pir la proclamaziun da la republica a Paris ha gudagnà las simpatias dals republians svizzers per la Frantscha (...). Ma questas valevan bunamain senza resalvas mo durant las duas guerras mundiales (...). Silsunter era la Frantscha ina da las victuras gra-

zia a de Gaulle [1890-1970] ed a la resistenza [cunter l'occupaziun tudestga]. La Romandie giubilava (...). President François Mitterrand [1916-1996] aveva ina profunda simpatia per la Sviza e vegniva savens en visita en la Romandie; ses temp è stà in punct culminant da la francofilia romanda. Ma lezza ha sa calmada suenter 2000, e quai cunzunt tar la giuventetgna.»

In Genevrin critic

Da 1944 a 1968, pia en ils decennis da gronda francofilia romanda, ha l'Universidad da Geneva incumbensà in sciencìa genevrin d'instruir in rom insolit nummà: «Géographie historique, politique, ethnique et linguistique.» Il 1962 è il docent vegni perfin «professeur extraordinaire». Ses num: Aldo Dami (1898-1977), docter da l'Universidad da Debrecen (Ungaria), burgais svizzer davent da 1946. Ses bab era d'Empoli (Toscana) e sia mamma figlia d'in pèr austriac. Quatter onns suenter la fin da sia collauraziun a la «Gazette de Lausanne» hal pubblicatgà in essai intitulà «Dernier des Gibelins» (1). Ils «gibelins» (per talian «ghibellini») eran ils «partisans des empereurs d'Allemagne, en Italie» (2). Dami en lez cudesch sa definiva sez «oravant tut Svizzer, lura da la regiun dal Danubi (...) – ma betg Franzos (...). Nus Svizzers essan oravant tut d'in pajais 'gibelin' (...) situà tranter Germania ed

Italia, a chaval sur las Alps nua ch'el garantescha las colliaziuns tranter nord e sid. El vala sco guardian dals pass» (p. 122). Dami stigmatisava la parzialitat da la pressa romanda durant l'Emprima Guerra mundiala: «Ella copiava simplamain la pressa franzosa enfin a 1918 e lur anc onns a la lunga (...). Ella publitgava las novitads militaras da l'Entente cun lingias grossas; quellas da la Germania vesev'ins strusch (...). Ins beneventava fugitivs beltgs e schuldads franzos blessads u internads (...). Ins salidava l'invasiun [britannica e franzosa] da la Grezia cunter retg Constantin, quinà da l'imperatur Guglielm (...). La Frantscha uffiziala aveva adina raschun (...). 1918 a Geneva han ins acclamà la visita dal general [franzos] Joffre en unifurma» (pp. 145-147).

In ami da las minoritads

Dami crititgava che la pressa romanda na publitgava betg las brevs da lectur cunter «la politica d'assimilaziun sfurzada pratitgada en Alsazia e Bretagna, nua che la magistratura chastia ils uffants che discurran lur dialect, e quai schizunt durant las pausas» (p. 159). L'autur remartga però en la davosa nota da «Dernier des Gibelins», scritta 1960 u gist avant: «Dacurt crititgeschan nossas gassettas la Frantscha a moda pli murdenta e perfin pli vehementa, quai en num da l'Europa (...) e cunzunt pervi da l'Algeria»

(p. 162, nota). Ma ils temps han sa midads. En in essai da 1968, publitgà puspè 1980 grazia a la Pro Helvetia, scriveva Dami: «Las etnias d'autra lingua en Frantscha sa dasdan: Alsazia, Flandra, Bretagna, Pajais basc, Catalugna, Corsica (...). L'opinio romanda s'interessa dapi 1940 bler dapli per ils cumbats politics franzos che per ils fatgs federais 'lungurus» (3). Curt avant la mort da Dami è cumpari ses atlas istoric davart ils cunfins europeics en il 20avel tschientaner, grazia a l'agid dal Fond naziunal svizzer per la perscrutaziun scientifica (4). Quatter chartas dal volum pertu-tgan la Romandie: Cointrin (nr. 174), traïs vischnancas genevrinas (nr. 175), Finhaut/VS (nr. 176) e cunzunt il chantun Giura (nr. 192, commentari pp. 365-370). La charta nr. 186 mussa «les régions de programme en France»; ses commentari precisescha: «Ils Bascs preten dan in 'département' basc cun status biling» (p. 353).

1. Aldo Dami, *Dernier des Gibelins. Réflexions hétérodoxes sur la politique*. Geneva (Editions Contanâtre) 1960.

2. Paul Robert (ed.), *Le nouveau Petit Robert*. Text midà e schlargià da Josette Rey-Debove ed Alain Rey. Paris (Le Robert, ISBN 978-2-84902-321-1) 2008, p. 1152, chavazzin «gibelin».

3. Aldo Dami, *La passion de l'indépendance*. Losanna (L'Age d'Homme) 1980, pp. 83 e 97.

4. Aldo Dami, *Les frontières européennes de 1900 à 1975. Histoire territoriale de l'Europe*. Geneva (Médecine et Hygiène) 1976.